

江西詩徵

江西詩徵卷二十六

南城曾燠賓谷編輯

元

艾性夫

性夫字天謂臨川人與可叔可翁稱三艾先生闕

門教授執經者盈門入元仕江浙道提舉有弧山

詩集

按艾氏家乘性夫宋咸淳進士官煥章閣待制罷歸未嘗仕元今據四庫書提要編入元

古意

折柳繫離船船行柳條短賴有柳上花飄泊隨君遠

采蓮莫采花采花損空房留房結青子種作明年香

匆匆采桑女花雨溼襜袖春風十二絃生世未觸手

浣衣輕浣布布縷不如絲絲堅猶易穿布弱從可知
佳人買明鏡意重輕千金結以雙羅帶欲照蕩子心蕩子
渺不歸鏡影春雲深

賤妾燕子身銜泥巢君堂遊子黃鵠志辭家猶南翔采花
爲誰容襲蘭爲誰香安得隨長風寄子雙明璫

雜言

若梧闕弓劍阿閣無祥禽魯叟已長喟矧敢求之今區區
蓮勺人伯氣方浸淫紀年侈嘉瑞作物誠何心隱顯始偶
然豈必聞韶音黃河千丈渾歲月亦已深矯首不可俟用
里逆山陰

勛華不並世揖遜無餘傳緬彼巢與津佳兵豈其天履霜

一何微坤冰一何堅誰謂知幾人尚俟觀伊川斧袞了不
公正閭雜紀年豈擬王仲淹而愧魯仲連

燕趙多佳人珠華衒天街鄭魯有游女折柳弄青梅春風
趁姿媚諧笑爭徘徊幽閨有貧醜修潔不自媒縫布以爲
裙斷荆以爲釵簪沙事機杼蓬沓蒙烟埃誰將好德心爲
爾停漸臺

枯桐斲山骨絃以冰蠶絲信指發孤調悠然造希夷揚以
寄吾歉抑以寫吾悲悲歡生我心無庸他人知我若有黃
金不鑄鍾子期寄語伯牙翁絕絃良可嗤

猫犬歎

飯猫奉魚肉憐惜同寢處飼犬雜糠粃呵斥出庭戶犬行

常低循猫坐輒箕踞愛憎了不同拘肆固其所虛堂夜搜
攪忽報犬得鼠問猫爾何之翻舞竊醢脯犬雖出位終愛
主猫兮素餐焉用汝

諸公賦東園兄銅雀視甚夸余獨不然然蘇長公詩
銘梅都官長句皆爾如謂舉世爭稱鄴瓦堅一枚不
換百金頒不作鴛鴦飛乃有科斗情入用固爲貴論
古難與并之類是已敢併爲之反騷

臨洮健兒衷甲衣曹家養兄乘禍機匹夫妄作九錫夢鬼
賊敢學神龍飛負鼎而趨不遄死築臺尚欲儲歌舞但知
銅雀望西陵不覺妖狐叫墟墓分香賣履吁可憐所志止
在兒女前竟令山陽奉子出爾反爾寧無天陳留作賓

向司馬包羞更出山陽下國亡臺廢天厭之何事人猶拾
殘瓦古來觀物當觀人虞琴周鼎絕世珍區區陶甓出漢
賊矧可使與斯文親歛溪龍尾誇子石端州鴈眼真蒼壁
好奇不惜買千金首惡寧容汙寸墨書生落筆驅風雷要
學魯史誅奸回請君唾去勿復用銅雀猶在吾當摧

天下第二鐘歌鐘在弋陽真如寺破廡下其誌天聖
二年也劉石扁曰天下第二鐘旁書江南徐鉉書筆
力皆遒勁可愛不知第一竟在何許而此又濱於埤
沒可慨已因歌以遺寺僧使屋庇之

瀕江破寺如膠舟大鏞露立寒颼颼金繩鐵紐作斷綆土
花苔碧生樂頭我來摩挲攷歲月僂指落落三百秋想當

營度欲鼓火野鬼夜哭山精愁鑄之以紹威六州之鐵燬之以景升千斤之牛載之以長河萬斛之艦貯之以齊雲百尺之樓風高一撞撼天地世更幾變宜追蠡眼中驚見已無雙天下才稱爲第二庚庚古扁磨蒼珉徐郎妙墨吹元雲聲光暗啞盡埋沒宇宙顛倒方紛紜昭陵石馬化爲土此地蒲牢幸存古山僧作屋穩蓋藏他日岐陽求石鼓

臨邛道士招魂歌

錦襪生塵脫紅玉瓊蟾夜抱金蛾哭芙蓉露瘦寒花鈿鵲鵲樓空冷銀燭輕鸞小鳳橫紫簫彩雲密漾青霞綃桂心沁入瑣子骨蕊宮貝闕天都遙玉牀夢斷心欲死獨抱秋衾嚙香髓方瞳白羽青簡書駕月騎風渡瑤水瓊樓碧戶

翠霧香紫蘭結佩紅薇囊雲車仙子不可識芳卿寄謝眞
荒唐蔗漿不飲啼寒淚不悟齊人少翁詭安得天上蓬萊
宮却著人間馬嵬鬼

棠渡初雪

雪風吹凍冰人髭老梅著花明矮籬黃蘆蕭蕭白雁落野
樹歷歷青猿啼旗亭有酒味苦短地鑪濕薪煙粗煖五陵
狎客不下樓紅金火閣玻璃盞

木綿布歌

吳姬織綾雙鳳花越女製綺五色霞犀薰麝染脂粉氣落
落不到山人家蜀山樟老鵠銜子種我南園春雨裏淺金
花細亞黃葵綠玉苞肥壓青李吐成秋鹽不用繰回看春

箔真徒勞烏鵲箭滑脫茸核竹弓弦繁彈雲濤接掌玉筍
光奪雪紡絡冰絲細如髮津津貧女得野蠶軋軋寒機緯
霜月布成奴視白氎氎價重唾取青銅錢何須致我爐火
上便覺挾纈春風前衣無美惡暖則一木綿裘敵天孫織
飲散金山弄玉簫風流未遜揚州客

題陳搏題壁圖

長松梢梢老烟霧瀑泉飛落千丈布樹精搖手不敢呵雅
是仙人熟眠處睡蛇未死驚起來風吹野服冠崔嵬雙星
窸窸磨老瓦墨汁滑滑翻莓苔一翁擁篲供掃壁一翁聳
膊觀落筆欲寫未寫方昂頭野趣含秋正蕭瑟先生壯志
神龍驤欲跨八表提天綱市衢呼酒沃俠客豈肯老死蒼

山傍忽來驢上聽鳴鏑中原王氣開皇極心事西風一首
詩真人自在陳橋驛

浣紗曲

浣紗如妾心皎然照冰雪秋聲入絡緯炯炯織霜月裁衣
嫁作梁鴻婦白髮相看如此布不學西施矜媚嫵妝成欲
覓君王顧忘却土城山下路貪向銅龍溪邊住明朝吳騎
猛如虎獻入娃宮作俘擄含羞短製衣楚楚忍學翩翩鶴
翎舞

土城山西
施浣紗處

田家詞

大兒荷鋤去疏麻小兒提筐來采茶翁自決水灌秧芽今
年續食不可望一夜老風搖麥花

題陳所翁爲葉半隱作全龍邀同賦

鴟夷飲江供曉汲塵尾拂屏翻墨汁密雲黯黯挾天來黑
風冥冥吹海立濤奔浪駭恣神怪驚起蒼龍九淵蟄鬚髯
怒插霜戟寒鱗甲光搖春雨濕身蟠遠勢欲萬里吻渴滄
溟歸一吸僧繇汗背葉公走祇合庸奴事供給所翁渤海
陳元龍小傍皇華在原隰酒酣作畫特餘事大手能旋倚
天笠只恐通神風雨急抉破天門夜飛入明日山翁倚屏
泣

蒲席歌

君不見象牀金縷黃龍鬚翠帷茸毳紅氍毹凝香燕寢環
瓊姝美物作惡常須臾能令王孫泣路隅富貴不到山中

煙霜空雁落寒陵膚西溪女郎織春蒲作席照眼涵清腴
髮僧方丈供橫鋪蒼烟翠霧不可摹摩挲溫厚便鶴軀高
眠黝黝忘朝晡遠夢颯颯生江湖楮衾竹榻蒲爲徒觀美
不足安有餘更生九節壽老夫百年與爾同卷舒清風倂
兀超儿遽

射虎行贈張生

深村落日啼寒鳥中有十數黃於菟飽吞獬狗未足醉時
失行客驚相呼蒼髯老翁百夫勇蹶張強弩金僕姑潛機
夜半發乘矢黃髯白額殲其渠寢皮食肉爭賞快入穴取
子無留餘嗚呼山中猛虎今已無人間苛虎誰驅除老翁
負弩先辟易此虎咆哮角而翼

題明皇醉歸圖

金車山重牛難挽五花嘶出長春苑大官供頓宴驪山三
郎沉醉歸來晚酩酊馬上扶者誰秀眉照眼兩國姨紅香
托臂手亦軟三馬相倚不敢馳黃門擁導盡端美錦衫繡
帽春風起解醒尚恐需餘尊捧把玉卮行復止最後一馬
壽王妃驚扇夾侍雙瓊姬酣酣嘿嘿意自遠恨不酩我漁
陽兒歸陳無逸今安有却作醉徒供畫手昭陵百戰大山
河涼州幾甕葡萄酒

兒餒與郎罷妻寒怨橐砧唐眉山詩也戲爲箋之

父天不可與夫君不宜怨要知古聖賢貴在素貧賤父常
煮字不成飯夫常織文不成絹衣麤布衣蔽藜藿去耕原

上田徃種陌上桑穫雲秋穗重皴雪春絲長汝溫汝飽官
征忙翁出校書爲汝償

過石泉寺

薜壁作怪畫石泉操古琴藤多山木老僧瘦道根深白鴿
隨人飯青猿抱佛吟經過恨不數帶雨度遙岑

雪盡

雪盡孤峯瘦家貧老夢寒春鞭雙影動歲節五更殘努力
三餐飯滋身九轉丹時危從道喪不敢棄儒冠

飯客

菜剪堯時韭羹羞晉代尊家寒多食淡客好不嫌貧一夜
小窻雨百年華髮人明朝未須去老別最傷神

正覺僧榻

贊公分半榻卧近竹西樓四壁寒蛩夜一山黃葉秋夢隨
三鼓動月向半窻留零亂芭蕉影禪衣爛不收

有感

江漢亡維楫山林困蒺藜頭顱春雪重心緒晚雲低掛樹
蛇留蛻踰垣虎印蹄遙憐伯勞燕辟地各東西

辟亂逢故人

亂裏相逢各自忙少依松影話淒涼古來尚有種桃處今
去當傳辟穀方馬蹴黃塵遮日暗鬼吹青燐隔林光海川
未必非天數空對西風老淚滂

苦雨喜晴早作散步

寂歷山房久杜門，清晨踏碎碧苔紋。
池經宿雨添三尺，花怯春寒瘦一分。
滿地月涼翻竹露，隔溪風細度松雲。
近來生計隨緣足，半畝荒畦手自耘。

哭菊存蕙山二兄

黃臺瓜蔓已淒涼，五雁飄零不著行。
一脈僅餘三老在，半年又哭兩兄亡。
菊園霜熟秋香寂，蕙帳雲寒春夢長。
愁絕吟魂招不得，西樓風雨憶連牀。

重宿芳草渡

曾卧江樓聽雨聲，蕭疎又似送歸程。
正如老馬倦行路，忽有鶉姑啼晚晴。
繞屋種花春爛漫，隔窗無樹月分明。
蒼頭不管人眠熟，連報嚴城打五更。

看鏡

自磨寒鏡看頭顱
短髮蕭蕭不受梳
天地風霜吾輩老
江湖
煙雨故人疎
道窮分命真如紙
世亂功名不要書
縱有黃金難鑄錯
一編殘易伴犁鋤

安南貢象

錦韉寶勒度南雲
到處叢觀暗驛塵
人喜此生初見象
我憂今世不生麟
半年傳舍勞供億
德色中朝動搢紳
粉飾太平焉用此
只消黃犢一犁春

聞雁

枯樹淡秋影
濕雲凜夕陰
江天一聲雁
世事百年心

落第口號

萬里長風鷁退飛
白澆淵水濺征衣
滿身只有梅花影
不帶西湖柳色歸

補破爲杜詩下轉語贈老婦

一寒誰復解綈袍
百結重縫嘆汝勞
莫遣海圖歸短褐
此身正自困風濤

孺子亭

斷草寒煙故宅荒
高風千古映湖光
獨憐漢帝徵車重
不及陳蕃八尺牀

題危兒心所藏陳常菴水月障及松鶴蘆雁各一首

陳郎筆勢并州剪
十幅生綃秋綠遠
老蟾欲作騎鯨遊
推墜玉盤波底轉
謫仙濡袍窺采石
東坡醉客歌赤壁
兩翁

已矣愛者誰我欲扁舟撼長笛

墨池幻出虬龍蟠徂山頭烟雨寒胎禽獨立衣縞縞骨
瘦西風拾瑤草靈根琥珀三千年紫皇勅賜青城仙乘軒
竊祿正自惡何似歸來一邱壑

風吹黃沙石磧冷霜葦無聲弄寒影兵塵隔斷衡陽雲溪
藤捲送瀟湘景蘆花雪老菰米秋芙蓉露下天悠悠阿奴
呼起字不斷寫出萬斛江南愁

解棋

兩雄相持機不發一著輸先智相軋退守皆虞虎穴空通
和不肯鴻溝割危枰已屬墮甌裏巧勢爭看強弩末疲思
熙熙神鬼寂密運茫茫天地闊悍雞趁鬪不暇啄駿馬爭

馳名忘秣增禽睥睨欲高舉且免迷離思遠脫死中求生
背水陣灰冷復焚餘燭跋白登倏報沛公走關與俄間趙
師活傍觀駭服算入妙對局虛驕氣方奪人生勝負何可
期生達難欺死諸葛推枰一笑拍闌干滿袖松風涼潑潑

杉樹脾晚憩

倦童呼不諾久客坐長嘆野色歸烟暝秋聲入雨寒
閤人江樹老經火路脾殘近郭魚羹飯招呼作晚餐

送客至靈谷

仙林路細出山腰靈谷峯高入紫霄立石借爲題字壁倒
松因作渡溪橋雨花濕地人歸晚烟草迷川馬去遙記得
元都種桃處黯然分袂各魂銷

遊古汴趙氏溪園

不起樓臺作熱官小園回合抱溪灣
露溥花曆春紅濕煙護松筠晚翠寒
已向掌中旋宇宙正須胷次著雲山
可能再爲蒼生出鶴怨猿啼攪夜闌

次吳壽翁溪園韻寄題

營營誰肯卧滄洲喜有高人此枕流
得水最多知地勝種花無數欲春留
圖傳笠澤三分畫夢繞黃淤十里秋
料得江楓吟水了載詩應汗謫仙牛

謝惠楮衾

厚於布被擁公孫清似荷衣伴屈原
捲送春雲吞入夢翦成秋水淡無痕
五更夢瑄噓寒谷一榻梅花近雪村
直作

黃紉紋錦看日高睡穩不開門

題賤容

骨多肉少與梅同老向江南風雪中萬事羞稱司馬好一
生不送退之窮偶貪識字頭先白稍欲工篆面卽紅說與
丹青莫饒筆肩山只合付何充

除日立春晚山危謙夫來訪

歲如舊政方書滿春與故人同惠來白髮最愁新歷換清
談且博笑顏開屠蘇卯酒紅生暈細菜辛盤翠作堆但覓
年年各強健不妨日日小徘徊

卽事

一片輕鴻度小坡半溪淺碧浸叢莎黑雲垂地雨聲急黃

葉滿林秋意多短髮未冬先有雪懶心如井不生波孤砧
已報寒消息欠問眠鷗覓菱荷

宣和御筆二扇面

紈扇輕盈寶月輪鶯花點染玉園春憑誰爲障西風起萬
里煙塵竟污人

黃蘆白雁小汀洲奎藻香羅一片秋勝似紇于山下雀凍
飛不去使人愁

木芙蓉

露冷紅酥不帶愁湘蘭楚菊共清修靈均死去無人問閒
却滄江一片秋

徐瑞

瑞字山玉號松巢鄱陽人元初爲本邑書院山長
有松巢漫稿

尋幽

尋幽烏石谷曳杖白雲岡野燒半空赤西風萬葉黃

夜坐

丈室四壁靜孤燈永夜明蒲團清坐穩簷鐵兩三聲

故夏與南翁往來里社共聽松風盤旋久之欲作數
語不果近日偶至其下悵然興懷追賦六言一首

夜語連牀未了村醪時復一中不怕石頭路滑要聽古社
松風

偶題

曾駐金華傲紫煙偶來此地了塵緣
春風白石岡頭路虛老松花過一年

甲午夏日讀爾雅有感

梁間客燕苦相依韝上餓鷹肉不肥
愛殺前溪雙屬玉羽毛如雪背人飛

書壁

愛山日凭西樓角聽雨長來破寺中
可恨無人同此味繞簷疎竹鳥呼風

題小齋壁

賣藥城南二十秋得錢取醉酒家樓
近來不敢出山去怕有人呼韓伯休

溪上晚眺

望逐飛雲去天低落景黃江湖流不盡宇宙事何長
帆影行空澗漁歌出莽蒼沙平秋草遠鷗鷺未相忘

重過鐘潭寺月灣

五年三到此門逕怪頻移絕壁何年樹空廊異代碑
微瀾生古瀨浮翠擁修眉煮茗談時事山僧總未知

與陳善從

出門小天下知子欲昌詩廬阜孤雲眼芝山夜雨思
勿輕千里別動是隔年期萬一踰淮去毋忘橘頌詞

夏五有旨徙豪右郡邑以吾家充數與章正卿同泊
舟琵琶洲下

去國懣懷惡開帆眼界新同爲萬里客猶是一鄉人浪說
王孫富誰憐郭解貧江妃應笑我從此素衣塵

寄周南翁用月灣寒食韻

獨夢雲千里清愁雨一林江山空有約桃李易成陰自是
乖幽賞何由話苦心興來當逕造剪燭夜堂深

次劉東仲見寄

丰姿明玉樹清論瀉秋泉霧豹文何澤風鸞意自仙超然
由靜悟妙處可言傳倘遂卜隣願游從不計年

自省

閉閣焚香一欠伸晴窗如鏡暖如春平生自有會心處後
世豈無知我人漫註蟲魚消白日莫緣蠻觸喪天真客來

指點牆東柏雪壓風欺色轉新

二月廿九日收宗玉弟京口書還家有日喜而賦詩
半歲無書界我胸短篷念汝過殘冬宦清但可京口酒客
夢應隨浮玉鐘棄縱向來緣底事妍粧今日爲誰容書來
贖喜歸期近伴我清陰倚老松

客中清明

光陰迅速一百六老境侵尋五十三千里懷人黯風雨五
更歸夢到松栴丹爐火足心兵息茗椀香濃舌本甘次第
盡償芒竹債結茅歸老此山南

夜月如晝與仲退坐松巢煮茶

河淡星欲無碧展天一幅天孫分錦章薦此半規玉明入

千家窓此興幾人足慷慨商聲歌主客俱不俗泠泠古松
根枯樵煮寒瀑清嘯拍闌干悲猿挂高木

田園

結茅北山下竹樹深以幽門前二頃田躬畊遂吾謀東風
二三月綠水如潑油戴星事犁鋤戮力期有秋經行彼何
人黃金絡馬頭停鞭畧躊躇爲問幾時休所得不償勞胡
不從我遊再拜謝行人此意何綢繆相從良不惡違已誠
所羞卿宜用卿法吾亦飯吾牛

斲桐作秧馬斷木剡泥船咄此至微物當趁歲月閒阿童
御轂棘吹笛前山前迎我相指似村西炊晚煙

方湖涵深碧移種水芙蓉壤沃不待培周回已芬敷豈惟

花實美根葉尤所須今年種菱芡明年種菰蒲生涯日以
廣而不勞耘鋤月明撐舴艋長嘯聊自娛

雨坐城邸登葆真院小樓望湖山清坐至暮

溼雲低古城絲雨迷寒空平湖北風惡雁叫菰蒲叢疑有
隱君子孤舟釣空濛煙波渺蒼莽欲往嗟無從道人數龜
息默坐飢腸充湖東古招提暮鼓鳴蓼蓼

壬辰社日芳洲領客梁必大湯景文吳德昭吳仲退
李思宣周南翁遊芝山寺登五峯亭瑞與焉羽士洪
和叟方君用載酒來會以雲飛江外去花落入城來
分韻賦詩得江字

昔我落城市日厭塵滿腔攜書歸故山三年師老龐興來

復此遊名勝萃一邦東風三日雨孤吟倚篷窗晴天澹新
碧扶藜度危石同袍二三子聲應不待撞意行得古寺共
尋葛藤椿天風鳴珮環冉冉白鶴雙坐看廬山雲大醺傾
酒缸欲去復裴徊返照明春江

仲退對月有懷芳洲景文至不忘僕爲古詩三首語
意濃至次韻以謝并寄芳洲景文

我行溪上路行雲爲徘徊天高北風惡叫絕鴻雁來起望
杜若洲渺渺絕沿洄孤芳據其勝修潔無纖埃俗子不敢
近石梁尚崔嵬我如剪翎鶴老志空低回又如渴蠹木枯
根莽難培巧拙有定賦神功若爲裁持此欲叩君溪寒雪
皚皚

景文大兄行世念如浮雲自讀仲退詩夜夜夢見君憶昨
初識君所見溢所聞促席傾底裏談諧意彌勤尚說二湯
公剪燭夜達分共悲風流遠纍纍北邙墳今年芝山聚有
感蘭亭文醉墨出三昧逸氣凌鵝羣茲聞賦遠遊應接當
紛紜中洲盛陰事羣公氣如焚勗哉爭長難吾衰不能軍
丈夫貴意氣豈必在合并琅琅對月篇中有伐木聲夫子
黎湯流事事誇奇情未忘雷張舊蒯緱青萍向來在匣
時雌雄互悲鳴分離未云遠涇渭判濁清精靈諒密契歲
月空崢嶸吾方師漆園因劍論養生時時呼斗酒磊落饒
使平

今日行我圃

今日行我圃欣然會吾心
町畦分燥濕種蒔論淺深
柔脆置其陽堅實植其陰
瓜芋既蓊蓊桑麻亦森森
晚菰與早韭鬱然起如林
雖無五畝勝寸寸皆黃金
學圃聖所鄙勢塗力難任
不辭鋤鋤勞且免蒿艾侵
君看門前客此樂無由尋

送余晉仲游廬山

登山信有道游山誠好奇
胸中無邱壑歷覽將何爲
廬君倚天立秀甲東南垂
非有千里遙滙澤同津涯
平生幾入夢未往神先馳
元煙鎖青牛鹿場草離離
竹林隱雲表眞漢不可窺
子行勿浪漫尋訪宜舒遲
靈局憑誰啟絕學從誰師
老我世味淡愛山心不移
床頭赤藤杖時作龍吟悲

爲我謝廬君行當赴幽期

九月四日偕弟可玉外甥張敏修吾孫棟游西山訪
古追懷甲戌舊游感嘆不已紀事五十韻

秋日清且厲發興山西游步出錢塘門纍纍但荒邱繁華
歛消歇王氣竟誰收寂寞石函橋小水清淺流秦皇纜舡
處螺髻現佛頭雖非凌雲像雄偉亦罕儔開示一指禪觀
者領悟不作禮三皈依將行復綢繆浮屠踞山巔何年困
鬱攸返步遵大路叢薄新篁抽前有佛足泉一竇清瀏瀏
淒涼鄂王祠墓道鎖松楸可憐忠烈魂寄此土一抔遺像
儼中堂怒氣橫雙眸誤國彼何人寸斬不足酬迺遲訪玉
泉泓澄湛靈湫老龍問神蹤金鱗自夷猶白詩揭楣間三

嘆歲月悠荆榛何王府瓦礫誰家樓當年歌舞地今縱羊
與牛或爲少僧廬或爲老圃耨徑趨九里松吳筆勁且適
靈鷲號飛來荒幻不可諷直北抵靈隱殿宇壯岩甌高峯
堪遠眺欲上畏櫬樓冷泉貯清寒古木扶盤樛瀾茗鬚髮
婦呼猿白頭叟岩洞千佛相黃金飾琬鏤古人留姓字興
懷仰先猷但恨芳穢雜殘缺難盡收面南歷三竺氣象恰
相侔山石剝擎確竹樹含清幽蒼藤蔽白日畧約臨清溝
小憩流觴亭飲泉雪入喉上竺擅翠密嘯壑風颭颭翛然
白衣仙坐閱塵世浮寺有野處碑文章粲炳彪陸子亦有
記日晚讀不周匆匆回六橋勝處難窮搜三賢堂久蕪湖
山跡空留玲瓏一片石屹立獨忘憂遙睇孤山雲高致希

前修憶昔縱游賞
冰盤羅珍羞
畫舫載娉婷
簫鼓擁俳優
回首煙塵飛四十
又四秋
朋儕愴邱首
桑海驚風瀛山川
無古今
撫事增羈愁
買船絕湖歸
城市燈火稠
同行二三
子小酌雜嘲謳
詩成慙挂漏
醉墨如蟠蚪

聞促織有感

苔花露重銅鋪濕
深閨蠟燭紗籠碧
啾啾四壁候蟲鳴
促人蚤織聲不停
君不見宮中自置機
與絡儘君有絲難得
著

城上謠

北風吹沙湖水黃
離離衰草覆女牆
曼纓紫髯馬上郎
腰間短劍明秋霜
城西砧砧登登處
夫君已戍交河去
角聲

漸起鼓聲住亂雅啼斷斜陽樹

大德元年丁酉歲六月大雨前所未見父老云百八十年無此水矣仲退賦長句紀事次韻

曾將太乙推主客不眠坐數蓮花滴今年春夏甲子雨白髮無端爲憂國乘舡入市識不虛平陸成江勢何斤乃當六月初五夜天意冥冥難察識直疑女媧功未完石破天穿地維拆飛廉上助澎湃威馮夷不闢泉源脉城中魚鼈混生人樓堞瀰漫不計尺彭城當年二丈八蘇公隄衛無遺蹟喜聞賢守力賑濟安得神人拔其塞不然帝復陸渾怨特遣五龍施此溺

次景文聽松風韻

萬壑蒼烟深閉閣此客入山童放鶴天球琬琰一代珍合
止笙鏞九成樂胸懷正自小滄溟風骨端宜直崑壑三年
烏帽墊京塵至今夢裏喧車鐸渴來醉卧白雲根飽聽松
風中夜作空中起用一何奇聲外生聞本無著閒情空自
貞白癡雅罰何妨半山謔知君此興復不淺安得松間相
倚薄君山吟嘯早歸來蛟鱷縱橫風水惡

題劉東仲所藏長江圖

誰將剡素尺有咫萬里屈盤歸筆底江天漠漠水雲寬樓
堞微茫煙樹裏岷山濫觴東入海自古興亡難盡紀詩人
莫作畫圖看中有英雄淚如洗

夏日六首

江表言集 卷二十一
屋上小山叢桂門前綠水芙蓉渠問事唯唯否否逢人唯唯
吁吁

客散幽庭鳥集日長高樹蟬嘶有士懷戴安道無人鑄鍾
子期

世眼看朱成碧人情覆雨翻雲寧教頭責子羽莫令腹負
將軍

偶自樓遲偃仰誰無歷落欽崎兩則足見美玉九折臂爲
良醫

我生尚友千載不願爭名一時閉門寫范滂傳飽飯和淵
明詩

宇宙十年遺事江山幾段閒情一笑無人領畧杖藜竹外

徐行

一徐攷

攷鄱陽人瑞從子有仰山集

雙燕飛詞

是時村屋烈爲灰燼感春燕巢林作此詞

雙燕飛雙燕飛二月春風來八月秋風歸人間茅茨與華
屋年年任爾相棲依主人恩多重如許汝亦年年不忘主
何期一旦遭亂離兵火村村廢庭宇營巢梁棟皆成空主
人無家汝亦同舊時呢喃好堂戶滿地芳草烟濛濛雙燕
飛雙燕飛語若悲語莫悲主人倘亦得居泊汝再啣泥來
短扉

歸途會故人

亂後重逢喜可知丹心難改髣毛絲相親漿水秋風日細
話錢塘夜雨時獻策君猶期上國種花吾已滿東籬平生
曾有青雲志回首難爲薄霧移

從軍怨

天星動盪東方白人語喧喧沸靈壁男子從軍妾亦行急
急官期遲不得妾身本是田家妻何曾道路行東西一朝
不忍棄鄉井足未出戶先悽悽小郎牽衣大郎泣鄰舍送
行相聚立翻思骨肉團圓時情好那知有今日蒼天爲慘
雲爲愁翁姑大哭不可畱生兒納婦望身後百年骨朽知
誰收庭前花發年年枝此身此去無歸時苦莫苦兮悲莫
悲從軍千里遠別離

命子歸鄉

有序

余番陽鵲湖里之故家也生不逢辰遭罹多難流
離失鄉井者積有年矣丙午夏秋蒙有司著落田
土自寶遣仲子禮携家先往理其荒瘠以承先緒
且謀誅茅以蔽風雨而歸老焉臨行賦詩爲別云
扁舟載月下滄浪收拾清風滿布囊醉眼獨嫌天地窄歸
心猶恨道塗長斯文老我狼憂狼苛政驅人虎逼羊子去
我畱情罔極倚門終日淚相望

秋夜客中

策策西風透碧紗秋香吹動月中花萬山不隔歸鄉
昨夜依稀似到家

夜坐思歸尚異鄉夢回酒醒到殘釭秋風不管人憔悴落葉蕭蕭打客窗

過太陽埠

時吳王卽位三年

偶過太陽埠數家溪岸邊橋通沽酒市人聚賣魚船布米夷相易軍民雜不喧番江好風景漸似太平年

李思衍

思衍字昌翁一字克昌號兩山餘干人至元間累官國子司業與禿盧同使安南獨不受贖終南臺御史有兩山稿

見王參政

獵獵風沙透紙窗地爐火歇冷侵牀一聲孤鶴唳殘月幾

杵疎鐘敲曉霜黍律噓春燕谷暖梅花入夢楚天長歸壩
乞趁東風軟醉裊絲鞭吟綠楊

寄江西魏按察

霜氣先收紫氣沈六絲轡動使華臨寒生柏府風霜面清
照梅花玉雪心一道秋江澄濁浪千厓曉色破頑陰水天
霞驚吟情逸只恐商家要作霖

上雷御史

臺上棲烏顛曉寒珠簾雲靜楚天寬星芒搖動龍阿劒霜
氣橫成鹿角冠苦透柏心風力勁清臨梅影雪痕乾渾源
聞有傳家譜夜露心香借易看

妙高臺

危亭新構客持觴雨挹闌干面面涼烟外好山供水墨風
前老樹奏笙簧接天淨綠秋江白著地形雲晚稻黃驟裏
絲鞭歸興逸水晶宮殿桂花香

次韻單徒提舉

百蠻冠帶悉來庭九虎臨關萬雉城漢殿風馳十行詔唐
藩雷動衆軍聲海涵春育民膏澤雨施雲行天性情聽得
老農扶杖語紫微垣畔泰階平

汴京懷古

滄海成田艮嶽荒誰能行役不徬徨青城北狩隔薊里花
石南來寶纜綱土暗塵昏天水碧風輕雨過女真黃無人
可語宣和事九些陳酹酌一觴

會同館

萬間頂顙翠光團千尺廊腰眼界寬
鴨脚參天風雨老龍髯
蟄地雪霜寒庭花飛墨空遺恨
宮葉流紅不忍看古往
今來只如此夕陽搔首倚闌干

華蓋樓

三十六坊如掌平長橋短艇水縱橫
銀河一道江連海畫
障四圍山繞城老樹煙雲春綠暗
小樓簾幕曉紅明陰陰
翠影誰家屋夢覺草池鶯一聲

石牛行

寒牛殼蘇秋江烟五丁擔落石一拳
驚濤拍岸撼不動夕
陽老背供鴉眠天荒地老煮白石
頑懶不過蒼苔田騰騰

臥地帶佛性尚肯遠護風濤船泥深蹄轉重鼻缺繩難穿
既不能西推紫氣度函谷五千道德言神仙又不能糞金
開秦塞隔絕鳥道四萬八千年渴奔一斗酒傲兀廬山前
潢池刀劒賣已盡貞觀斗米方成錢雨犁急趁勾芒起不
然碎汝春風鞭

行贖有禮辭之世子舉陸賈事亶亶見愛謝絕以詩
緣璽南來奉玉音九重惻怛爲民深蜀人爰命相如檄越
使何求陸賈金冰雪孤忠臣子事乾坤生物帝王心從今
但得天從欲航海梯山歲歲深

彭城

一水淵渟綠不波四山玉立碧嵯峨城頭芻石黃樓賦臺

上風雲赤帝歌竹帛有香豪傑在山河無恙廢興多男兒
要作千年調戲馬臺高石可磨

隆山埵院

峰頂浮圖第幾重四天塵界盡虛空縣居島嶼縈迴處海
在煙霞潋灩中浴水垂盤腸谷日轟雷擊鼓怒濤風蓬萊
咫尺闌干底平步長橋跨玉虹

見維揚崔左丞

十里珠簾一半垂揚州風物最宜詩平山倚檻歐陽子明
月吹簫杜牧之吟筆新添梅鼎手歌樓爭覓竹枝詞濡毫
願逐奚奴後描盡春風芍藥枝

拜許魯齋像

玉筍頭邊嬾押班
汗青筆削更重刊
直言何管雷霆怒
清節不知冰雪寒
性理晦庵眞學術
鬚眉商嶺古衣冠
欲求繪畫耆英手
寫送江南子弟看

漂母墓

登壇閒却釣魚手
廟食難酬一飯恩
春老五陵佳氣歇
近來誰復念王孫

周天驥

天驥字德之號耐軒武寧人應合子七歲能詩應
神童舉謝疊山深器之入元薦博學鴻詞累官吉
梧饒三路總管以平廣南功加兩浙都督旋拜江
西行省參知政事進封豫章郡公

題書齋

年光容易逝努力在春畦莫待秋風起高梧落晚溪

燕公楠

公楠字國材號五峰建昌人十歲能屬文再貢於鄉不第以薦通判贛州至元十三年江南平授同知吉州路總管府事累官大司農進湖廣行省右丞卒有五峰集

比見諸名勝所廣安侯雪詩病中偶成兩章錄呈一笑

疑是瓊樓上界仙散花布地又年年玉龍松老猶擎重翠羽寒梅敢占先甲冑戍邊思挾纊貂裘換酒不論錢舊家

風味都休說預喜豐年賦大田

銀潢剪水出天仙此瑞今無二十年南紀歡騰三白後北
枝春遜六花先此時沙漠應如席曩日京師屢賜錢臣子
願豐無補報負丞祇恐愧藍田

再用韻敬謝佳句之辱二首

凡花頃刻未爲仙天上瓊花占大年鑱劖黃精憐我老詩
成白戰讓君先吟牕祇想銀河瀑凍屋空驚玉蝶錢稽首
君恩同一飽明年我亦賦歸田

高寒驄馬自神仙擎出風標見盛年梁苑賦成驚歲晏郢
中曲好占春先爐灰我愧嬾殘芋茶沸君高陸羽錢忽憶
西江攜手去漁蓑江上看瓊田

蕭泰登

泰登字則平泰和人九歲入鄉校治論語義至元
間授湖南道儒學提舉元貞初以兵部郎中使安
南責其世子盡歸侵地而還歷官江南行臺監察
御史分守江浙行省卒

桂林馬上

漸前佳景真堪畫馬上垂鞭雨正霏平地起峯千壁聳半
山走雨兩蛟飛桂林自昔宜人處梅驛如今過客稀回首
翠屏看未足朔風吹絮白雲歸

白鹿洞

拓開鹿洞千年秘拔剪荆榛用力勞流水偶因三峽急飛

江西詩徵

卷二十六

元二

三

雲忽放五峯高自宜掃地看周易誰與尋芳讀楚騷追賞
紫陽無限意絕憐淪落付吾曹

卽席和世子韻

春風花雨落賓筵送客歸期看著鞭從此安南成樂土小
心長與戴堯天

劉岳

岳字公泰號東崖星子人爲文典雅工詩宋季東
遊遂居於吳至元間以奉議大夫官太醫院改翰
林學士知制誥同修國史終建昌路總管

送蕭郎中出使安南

喜拜龍形年第一薰風拂拂柳依依香含粉署星辰近典

重皇華禮樂輝北闕初頒恩詔下南荒愧謝遠人歸太平
氣象彌寰宇役事言還入紫微

張立仁

立仁字伯遠安仁人通經術工詩至元中薦授本
邑教諭張仲舉黃均瑞皆從之遊

仙巖

路絕傳丹處仙人蹟尙存懸崖時有杙邃洞不知門割據
惟高鳥經營獨老猿雲梯破羣惑思與智般論

飲禪直清

朝餐狙林橡夕飲虎窟泉幽棲豈不逸於道未爲全是以
少微星舍輝麗中天雲蘿謝招隱冠帶趨興賢魯生贊制

作商老安疑然董子述徵驗賈誼明經權威德有遭逢志
士無棄捐長貧若忘世一出垂千年折梅楚山阿賦詩江
水邊寂寞思古人中懷爲君宣

徐明善

明善字志友號芳谷德興人至元中官江西儒學
提舉嘗奉使安南歷主江浙湖廣考試拔黃潛於
棄卷中當時稱其識鑑有芳谷集

安南世子陳日炫席間索詩口占應之

乘傳入南中雲章照海紅天邊龍虎氣徼外馬牛風日月
入荒燭車書萬里同丹青入王會茅土胙無窮

劉詵

誥字桂翁廬陵人少穎悟詩文爲宋遺老所推重
江南行御史臺屢以遺逸薦皆不報至正初方卒
有桂隱集

古意

古風日以喪交道遂以圯昔時素心人忽若匪知己朝直
蓬萊宮暮宿光祿邸聯騎多季劇填門集金史疑嗔著王
下名德爲垢秕古言西施貴眾色失桃李不見秦張儀卷
舌讓蘇子

南方有佳人天質辭紅粧素手映輕雪明璫照羅裳二月
千花開笑語春風香盈盈水晶簾丹雲貫疏房自倚絕世
姿鬢鬢不能霜秋葉鳴西樓城烏啼夜涼高節良自固諒

不悲年芳

山中

晨食希早出出城日已辰况憫肩輿勞時亦步嶙峋嶙峋
苦難步投宿荒邨民啟扉熾燈火延客意頗真苦辭邨無
酒無以洗埃塵歲歉有穉粟尙可分炊晨高門多吠犬倉
卒難投身勿投高門宿勿厭邨家貧

溪橋落白水野路覆紅葉山邊四五家日暮煙火白歸牛
認深巷行客指新月邨田旱傷餘老穉筋力竭方今冬序
初饘粥儻未缺雪霜且已來卒歲諒何策

夜坐

月八暑未解夜久涼始歸山月升漸高照見幽人衣幽人

行未已月亦轉牆西

雲行樹陰薄風過樹陰欹雲風弄清夜政爾無人知惟聞
牆根水泠泠下秋池

中秋故鄉南鄰楊氏招飲

老來歸故里百事非故情惟有山閒月猶作兒時明是時
秋且半夕氣忽已清南鄰招客飲步聽危澗聲月色酒中
亂樹影盤中橫鄉曲佳節意風露白髮莖我懷豈在酒酒
觴且徐傾

荷花莊獨步

少年所寓畱今視爲故里鄰翁不知老笑我老如此徘徊
阡畝間感會獨在已雨足秋禾肥平偃如席几雞豚散原

隴菰芋繞池水饑僅稍已忘及此樂生理日莫樵未歸炊
煙數家起

吾與二三友周迴此田疇中歲風雨散茲游誰與儔望山
漸適意得樹亦少休峰回西風長吹我駝毛裘登高遂遐
矚一粟託九州去住定有契欣戚焉足留戲攀西祠花下
濯北澗流

曉行

星明天宇迴山驛鼓初發行人稍已動露氣漫野白方塘
浸道隅荒荒似寒月日出炊煙橫雞聲隔林樾

和臨江饒自然夜坐

庭樹秋月高危葉光欲墮孤蛩感涼氣唧唧稍近坐鄰家

弄機杼微燈山窗破寢齋生新苔禪裯掩關臥

和邵有初同飲熊氏小園

客佳不必多地近得頻往極知後花時聊復縱心賞樹深
路欲盡林缺天忽敞坐久飛雨來黑霧湧奇嶂清風雜笑
語共作金石響尚疑有餘韻隱隱在蓬莽豆觴稍狼籍賓
主各酣暢安知牆外人謂牆外叢塚千載落埃垓生時諒自謀
局促戒游蕩百營有醜妍一盡無老壯何爲苦不飲勞身
入羈鞅

山家阻雨得晴出郊

山家半月畱坐待雨聲住東風入我簷領客邨南去晴光
著天壤生意欲飛舞野禽拂清漣雜花滿幽樹回首西岡

麥十里綠如雨新年今日佳復作濟勝具兒時所經過彷彿猶可覩穿深過亂峰意與仙境遇白雲行洞口枯木記歸路安知山間人不訝余何故

九日偶賦

我性不藏事急吐如建瓴世人務寬厚叩意如堅城豈不共談笑何以同其情秋風一杯酒千載無淵明

哭袁從義

別君未兩月傳訃始疑妄童來得真報失歎淚自放歸城弔君兒內慄刮肝臟君廬乃未定欲哭無所訪念昔客君家我弱君始壯山窗古衣冠談論瀉春漲三峰奇競秀清絕行鴈蕩座客多英豪車笠填里巷廢馬騰驕嘶樓姬咽

清唱鼓鐘喧朝晡昌迎積饋釀夜詩涸鴈視朝酒發鴉盎
君尤嗜迂闊叉手折詞匠叩扉報警聯急吐如技癢約試
古洪州五月舟已榜蹉跎我興盡君志乃獨亢霜臺肅縉
紳昏闥排榮輶落筆風霆生四座色驚悵文書上省曹吏
黠歲月曠復以茂異聞州里許其當才高命苦奇選近身
已喪知君豈有待獨可念趣尚前年從謹兄千里殞茅瘴
賁志不得年追憶有餘愴君今復繼亡如山剗危嶂死生
固有數髮經乃相望福善理則那造物疑可謗知心幾何
人而况日泉壤君兒旣奠居麻雪始垂帳屬我病山噸乏
劣積哀狀束芻付兒輩含悽黯東向青春如昨日白髮餘
輩行悠悠洒墟荒寂寂鄰笛亮秋高風動木夜永月窺幌

三歎平生魂夢其隔風浪

題彭宜遠所藏稚川山水樓閣圖

平沙蒼蒼鳥未歸煙邨四合高復低漁翁兩兩青蓑衣賣
魚直上長楊堤千峰萬峰何崔巍朽枝瞰水忽倒垂倦驢
向橋欲渡疑後有羸僕勢若追却疑詩人獨尋詩舍鞍先
濟何所之飛樓縹緲山之西中有美人長鬚眉凭闌相對
知爲誰豈非海上喬與期宮中琪樹秋離離彷彿疑有香
風吹吾聞蓬萊有此地流水落花隔人世便當騰翮寄芒
屨小向圖中住千歲

題白府判仲謙所藏錢舜舉巖壑圖

我如謝公好名山開卷著我千巖萬壑間亂煙遙峯出縹

縹怪石翠樹相回環忽然山破飛瀑落皎如仙人玉帶垂
雲端喧豗欲撼溪谷動使我毛髮森靑寒不知其間有何
徑但見荷擔兩兩相追攀浮屠崔嵬蒼壁頂佛屋隱映長
松關下通窈窕知何處想見小溪穿石去沙邊汲叟犬相
隨橋上行人驢半渡林空路斷孤舟橫或坐舟尾或疾撐
左巖右灘地苦狹長篙落石如有聲我疑桃源從此近恍
若風景非人世欲呼錢郎問其塗錢郎已去誰能呼

野人家

野人家瓦少茅半遮牆外橫青山牆頭出葵花遶屋桐樹
繞屋麻地碓舂粟如黃芽小姑高髻髮爬觥平生有額不
點鵝月色夜夜照紡車木棉紡盡白雪紗爲言主家頗豪

奢繡羅作裙歌嬌娃州符昨夜急如火馬蹄踏月趨官衙
題鐵仲堅宣差所藏羅稚川煙邨圖

荒邨漠漠煙連山誰家野店兩樹間青帘稍出樹梢外秋
風敗葉寒斑斑路通白石流水亂長橋縹緲依山澗漁姑
得酒歸意速攜稚渡橋如落鴈寒藤老木又一川罾船方
饌曾斜懸有魚有酒復有客風致何必能詩篇亂鴉幾點
天疑莫欲泊未泊環高樹小舟七八散前灘或倚長篙收
釣具君不見鴟夷一舸遊五湖子陵羊裘釣桐廬安知若
人非其徒

南樓乘月

人間塵埃能幾何夜夜明月九州白獨提愁髮御秋風漢

江染之不成黑江流迎我來滔滔古今銷盡黃龍高樓頭
攜酒邀天飲我與殷庾爲三豪吳姬膚肉映肪雪笑倩坐
客穿舞袍胡牀吹玉龍朱闌懸豪曹已傾四海添我酒更
推三山鱸共鼈苻堅石勒豎子耳尺組縻之如獫狫昔人
功名何足論惟有風流千載存當時結束不成興誰愛明
月來端門我起舞君莫回姮娥隨人不可推君捉我影入
我手酌君玻璃三萬杯

陳所翁子雷巖畫龍

所翁畫龍妙天下墨水千江醉傾瀉天地變色草木寒霆
電交作畫爲夜陰風蕭蕭出空庭天落黃金壁間挂前身
是龍身不知龍來與語相娛嬉歲饑乖龍不肯起畫龍夜

出行雨歸不知雨到幾千里但見綃素濡淋漓所翕丹成
駕龍去雷巖傳家有奇趣蜿蜒半幅浩欲動鱗鬣槎牙攢
雲霧軒窗怒濤聲洶歟篋笥夜光亞吞吐嗟哉雷巖今亦
仙此龍神妙不再覩誰能久藏繫金柅雷公繞柱窺囊楮
只今春風急雨日夜多便恐一日飛去驤天河

寒食行

去年寒食城東橋郭田野花春搖搖城中家家出上冢久
晴爭試紈與綃松邊細馬擁繡鞦柳下輕車窺翠翹竹籃
買花分載酒酒酣遮路行吹簫高岡纍纍臨廣道敗徑短
籬編棘棗北人火葬哭望雲土人高墳歲剪草老翁愴咽
心未平童穉嬉遊未有情懸知十日辦一出羣蒿不及行

春心男兒百年驚昏宦燼癡未必輸精悍黃金堆堂紅頰
笑闔棺未了如雲散夏畦埋骨繞里閭海上田橫無麥飯
江山滿眼樵牧歌萬古行人一長歎我時醉臥山下家興
闌行吟西日斜郭門排前競先入却獨倚樹看歸鴉今年
孤邨又寒食閒笑清遊無一日人生時序良可驚疎雨閉
門落花積

山野中秋有懷諸子姪

百里不能返孤邨圍碧厓茆廬佳節夜秋雨老人懷多病
猶能賦長貧更寡諧中郎諸子姪今日定誰偕

對客暮坐

危坐高齋夕東來喜友生空庭疎雨後四壁亂蛩鳴燭至

瓶花落秋涼
架藥輕西頭
動刀尺澹月上檐楹

和劉寔翁後中秋

此地元無約
窮年亦倚樓
亂雲江市白
落木鬢毛秋
逢節偏驚客
資身可廢謀
天多今夕月
有酒未須休

劉邨岡山中

邨旱谿源絕
年虛鼠雀飢
庭風扉自語
山雨客先知
窮達堪杯酒
暄涼任鬢絲
梅花春欲動
不盡歲寒期

庚午上元雨陪學翁兄飲

元夕相看白
髮兄燈花應笑兩無成
邨膠薄薄客三五疎
雨瀟瀟漏幾更
老境情懷多舊感
荒年市井少歡聲
興來欲聽祈賓喚
門巷成泥嬾復行

和楊貫道兄詩

學易未成先退藏
鶴鳬非短亦非長
文章底用追韓孟
富貴元應屬禹光
已老不求方染鬢
平生惟有句成囊
星辰劍履危朝露
甘老秋風一草堂

故鄉夜坐有感

諸兄棄逝有喬木
病妻死別今空帷
淒涼聽雨夜如此
老大還鄉心轉悲
風氣百年無舊俗
江山滿目記兒時
孤燈明滅可誰語
援筆悵然還賦詩

和友人遊永古堂

勝日偶尋山寺幽
老僧石鼎沸茶漚
市窮路轉得幽地
人語經聲在小樓
君似淵明來白社
我如蘇子說黃州
雪乾

沙靜春晴好出郭何妨更小留

再用韻酬同遊諸公

聽盡城鐘聽寺鐘暖風扶醉覺衣重粥魚餉午催僧飯酒
榼行春酌墓松羈客得晴辭櫪馬歸人分路出房蜂簪花
泥飲田間老我自不如渠興濃

和友人遊洞巖追用須溪韻

雲峰髣髴畫圖真石戶深藏萬古身山水何知天下事神
仙亦是世間人日高壇樹三門午雨漲源花滿洞春濟勝
尋幽平日意天風吹動華陽巾

鄰有廢屋久閉金沙一枝忽穿屋山而出衆爲驚顧
然亦竟無一賞者

古屋幽花閉不知忽穿碧瓦怒橫枝辛勤自致高堂外却
得行人立頃時

詩窮

作詩能窮人誰能忍不作但見平生愁霏霏筆端落朝騎
孤鳳凰暮駕雨黃鶴手携王子晉吹簫上寥廓人言忌太
高下筆寧淺弱窮通信有命詩道未可薄

石人

石門何年啓疑與開闢俱上有遺世人形軀略模糊山空
明月寒往來誰與徒吾聞晉榆石能言兆妖樞又聞穀城
公頗窺陰符書叩之不應無乃嗔我愚

贈趙中山

中山本舊公子于道有得
蚤遊京師爲諸明公所敬

先生昔珮青珊瑚錦袍白馬玉雪膚夜遊釣天聽廣樂帝
旁分食瓊宮酥天風千丈吹綠髮紫鴛七十黃流蘇手斟
北斗酌玉女麻姑曉報滄溟枯東方烏啼白日薄姓名盡
變騎鯨魚華池內養九芝露金房獨照千年珠肩摩淨名
孔雀扇足躡子晉芙蓉車吹笙看月薊門市從者皆服貂
襜褕羣真虛左願聞道親寫文字爲其徒少年經世二十
策海水洗盡無畱餘始知古來忠孝士變幻不與常人俱
君不見韓亡流落子房子千秋萬歲傳編書

兒時喜見雪

兒時喜見雪凝待天雲黃晝觀捲箔恨暝色夜聞攬裘思
曙光佳人踏靴映玉靨獵士鞚馬驂白鳳千金高樓煥美

酒樓外三尺酒百觴寶香繡帳春色收俯視萬里成大荒
便從淮城取元濟直至延海歸蘇郎邇來悔狂年已過閉
門讀書學堅臥蒲團竹几聽蕭瑟畏寒自補油窗破欲論
往事誰復知但見羣兒似昔時

昭君曲

漢宮美人人不識初出宮門天下惜漢宮歌舞人不傳琵琶
馬上行人憐君王含情重悽惻只在殿前畱不得人生
豈是無知音知音已晚徒傷心天寒衰草沙似雪舉頭惟
見漢宮月十年漢使去無蹤夢中長在明光宮國家和親
四海樂不怨君王悲命薄君不見秋風茂陵英雄才萬里
江都嫁沙漠

酬以芳見貽

山露沾琴潤山風到鬢寒酌多迷夢覺語久雜悲歡身豈
如泥爪鬚難染石肝不知明月在何處是瑤壇

閒居卽事

小窗挂頰看雲過不斷東風吹鬢幡松古何知春至早花
濃偏值雨來多已安薄相食無肉更覺衰顏酒不酤無力
能爲移粟政有愁自賦采薇歌

彭琦初用坡翁紙帳韻惠建昌楮衾次韻爲謝

雪絲揉碎密縈連清臥梅花性更便茸暖何須蠻客帳座
寒但少廣文氊窗升紅日那知曉夢壓白雲疑近天但恐
少陵茅屋漏雨宵沾破不成眠

孫轍

轍字履常臨川人幼孤以孝聞監司屢辟皆不就
江西行省以遺逸舉轍一人吳草廬推重之有集
擬古次楊志行韻

涉江采芙蓉江水何澄鮮朱華映朝旭窮窳熏風前相望
不盈咫風波良獨艱攬之置懷袖撫玩空長歎春榮衆所
慕泯然無復言

孟冬寒氣至盼彼庭中樹忽得故人書中有相思句故人
隔異縣相望良獨苦候蟲鳴廣除落葉被衢路淒其對搖
落登高詎能賦白髮生鏡中荏苒流年度故人歲寒姿亦
有濟勝具相期佩飛霞共飲金莖露

青青河畔草春至不復腓
延緣被披陀飽彼牛羊饑
荏苒時序遷王孫終未歸
西風一蕭瑟楚客空傷悲
安知壯士心金石乃不移
陰陽無停運垂柳生金絲
鳥鳴百花開迴首乃爾爲
丈夫貴自勗千載以爲期

龍仁夫

仁夫字觀復號麟洲永新人
門學好古探濂洛之旨至
元間用薦授江浙儒學副
提舉不就學者稱

麟洲先生

琵琶亭

譏呂文煥作

老大蛾眉負所天
尚畱餘韻入哀弦
花心正好看明月
却抱琵琶過別船

醉石

淨社歸來倒石床
醉餘肝膽濕松香
行人只賞陶公醉
誰識悲涼述酒章

萬杉寺

修蛇一徑繞深松
飛閣華鯨杳靄中
祖衲廢場蒼蘚亂
昭陵遺翰彩雲空
人間今古荒崖綠
老子悲歡破帽風
共喜隔峯青峽近
更攜瘦竹度長虹

應小玉帶索詩

茵蔯池邊風滿衣
木樨亭下雨霏霏
老夫記得坡仙語
病體難禁玉帶圍

余濟

濟字心淵德興人芑舒子潛心程朱之學恥空舉
元初累辟不就與徐芳谷王葵初友善有谷雲還
稿

絕句

白首黃塵送隙駒那知靜處有工夫
幽人世念如秋葉萬樹西風一點無